

Visoki predstavnik Inzko se sastao sa državnim ministrom vanjskih poslova Japana Kishijem



Visoki predstavnik Valentin Inzko sastao se danas u Sarajevu sa Nobuom Kishijem, državnim ministrom vanjskih poslova Japana, te razgovarao s njim o trenutnoj političkoj situaciji u Bosni i Hercegovini.

„S obzirom da su lokalni izbori iza nas, očekujem da se izabrani lideri fokusiraju na provođenje reformi koje će stvoriti radna mjesta, olakšati investiranje i, što je najbitnije, voditi borbu protiv korupcije“, rekao je visoki predstavnik. „Od februara, Bosna i Hercegovina je krenula aktivnim putem prema članstvu u EU. Taj put je prepun prilika za građane Bosne i Hercegovine i treba ga slijediti što je moguće energičnije“.

Visoki predstavnik je također upoznao japanskog državnog ministra o nedavno održanom referendumu u Republici Srpskoj. „U isto vrijeme kada ova zemlja čini pozitivne korake prema Evropskoj uniji, neki lideri u ovoj zemlji uporno krše vladavinu prava i Mirovni sporazum. Međunarodna zajednica i dalje posjeduje potrebne instrumente za osiguranje provedbe Dejtonskog sporazuma. Sve opcije su na stolu“.

Visoki predstavnik Inzko je zahvalio ministru Kishiju za ulogu

i posvećenost Japana poslijeratnoj rekonstrukciji i razvoju BiH, u iznosu od nekih milijardu KM, što Japan čini jednim od najvećih bilatelarnih donatora Bosni i Hercegovini. On je naveo da je Japan isto tako jedan od najvećih bilatelarnih donatora za OHR.

„Želio bih iskreno zahvaliti Vladi Japana na njenoj podršci. Kako direktno, tako i kroz Vijeće sigurnosti UN-a, Japan je svoje finansijske i političke resurse stavio na raspolaganje za obnovu Bosne i Hercegovine“, rekao je visoki predstavnik Inzko.